

Exelénsia sira, Ministru Negósius Estranjeirus no Kooperasaun Dionisio Babo Soares no Ministra Edukasaun Dulce Soares; Diretora Peace Corps iha Timor-Leste Kavita Pullapilly; distintu konvidadu sira, omólogos no belun sira.

Obrigada mai hamutuk ona ho ami ohin iha ne'e iha seremónia juramentu ba ami-nia voluntáriu sira husi Peace Corps. Ha'u kontente tebes atu fó juramentu servisu nian ba sidadaun Amerikanu nain rua nulu resin hitu ne'e (27) ne'ebé refléta idealizmu aas liu husi Estados Unidos. Sira tama ona iha grupu selesionadu ida husi Amerikanu talentozu sira ne'ebé serbi ona iha Peace Corps dezde nia kriasaun iha tinan rihun ida atus sia neen nulu resin ida (1961) husi Prezidente Estados Unidos John F. Kennedy.

Hanesan voluntáriu sira Peace Corps nian, sira sei kontribui mós ba hametin amizade entre Estados Unidos no Timor-Leste. Liu Voluntárius nain atus ida hitu nulu (170) maka serbi ona iha Timor-Leste dezde tinan rihun rua rua. Iha loron ida ne'e, ha'u kontente simu grupu ba dahuluk husi Voluntárius Peace Corps ba Timor-Leste ne'ebé sei ajuda hanorin Inglés hamutuk ho profesór Timoroan sira iha eskola terseiru síklu no sekundáriu sira. Imi maka pioneirus!

Ha'u hakarak espresa ha'u-nia sinsera gratidaun ba ema sira ne'ebé serbisu makaas ona hodi lori Voluntáriu sira mai too iha momentu ida ne'e, no ba ema sira ne'ebé sei kontinua apoia sira durante sira-nia tempu tomak iha Timor-Leste. Ne'e inklui membrus governus nasional no lokál, líder comunidade sira, ofisiál polísia sira, Peace Corps nia funsionáriu sira no membru sira seluk husi Misaun Estados Unidos nian, Voluntáriu Peace Corps sira iha pasadu no atuál, no sira seluk tan.

Hanesan Embaixadora Estados Unidos Amérika, ha'u haree rasik ho matan oinsá Voluntáriu sira Peace Corps nian sai ona parte ida husi sira-nia família sira no comunidade sira iha Timor-Leste. Bainhira vizita Voluntáriu sira iha Baucau, Aileu, Ermera, no fatin sira seluk, ha'u rona istória furak barak kona-ba oinsá Voluntáriu sira harii ligasaun entre sira-nia família sira iha Timor-Leste no sira-nia família sira iha Estados Unidos. Ne'e halo sai klaru razaun Prezidente Kennedy nian bainhira refere ba Voluntáriu sira Peace Corps nian hanesan ami-nia “Embaixadór sira ba Dame.”

Ba Voluntáriu sira ne'ebé halo juramentu ohin, ha'u dezafia imi ida-idak atu sai embaixadór di'ak sira iha Timor-Leste bainhira imi promove koñesimentu di'ak liu tan kona-ba Amérika. Imi-nia serbisu iha imi-nia comunidade nia eskola sira, iha comunidade sira, no ONG sira sei iha objetivus tanjível no susesus barak. Imi mós sei iha objetivu intanjível sira maka hanesan: kria dalan foun ba diálogu, apoia

entendimentu ba malun, no estabelese fundasaun firme ba dame. Buat sira ne'e karik susar atu atinje, maibé hirak ne'e maka definisaun loloos husi servisu embaixadór ida nian no ema sei la haluha buat sira ne'e.

Ami haksolok tebes atu haree saida maka imi sei realiza serbisu hamutuk fo liman ba malun ho imi-nia omólogo no belun sira. Parabéns no ha'u dezeja ba imi buat hotu sei lao di'ak.